



**Komunikadu Imprensa
Munisípiu Covalima
01 Marsu 2024**

**JSMP kontinua haluan Programa Apoiu Seguransa Komunitáriu (PASK)
iha Suku Labarai liuhosi asina Nota Entendimentu**

Iha 21 Feveireiru 2024, JSMP kontinua haluan Programa Apoiu Seguransa Komunitáriu (PASK) liuhosi asina Nota Entendimentu (MoU) ho autóridade Suku Labarai, Posto Administrativu Suai Villa, Munisípiu Covalima ba períodu fulan neen iha tinan 2024.

“JSMP agradese tebes ba xefe Suku Labarai ho estrutura tomak ne’ebé hakarak kolabora ho JSMP ba implementasaun Programa Apoiu Seguransa Komunitáriu (PASK) iha Suku Labarai. Programa hanesan, antes ne’e implementa ona iha suku balun iha munisípiu Ermera, Baukau no Oekusi no iha tinan ida ne’e aumenta tan suku rua ba kada munisípiu ba implementasaun programa ne’e inklui suku ida ne’e. Objetivu maka atu hadi’ak justisa ida ne’ebé justu no ema hotu-hotu bele asesu iha nivel komunitáriu,” dehan Sra. Flora Soriano Menezes, Kordenadora Unidade Peskizadór Legál no Unidade Treinamentu no Advokasia JSMP.

Reprezentante Administradór Postu Administrativu Suai Villa, Sr. Augusto Borges iha ninia intervensaun haktuir katak programa ne’ebé JSMP ho Suku Labarai estabelese hanesan oportunidade di’ak ida ba konsellu suku foun sira, oinsa atu rezolve problema ne’ebé akontese iha suku laran, liuliu durante ne’e ita hatene katak problema barak liu mak Violénsia Bazeia ba Jéneru (VBJ), segundu maka problema rai no hun hosi problema sira ne’e maka ita nia entendimentu ba lei maka seidauk suficiente, nune’e husu ba konsellu suku hotu atu partisipa masimu iha programa ne’e, nune’e bele entende di’ak lei sira ne’ebé maka JSMP sei fahe ba comunidade sira, liuliu lei foun sira ne’ebé maka parlamentu prodús. Ikus liu atu akordu ida ne’e la’o ho di’ak maka parte rua tenke iha koperasaun di’ak ba implementasaun programa ne’e nune’e bele responde ba saida mak durante ne’e sai hanesan preokupasaun comunidade hotu nian.

Xefe Suku Labarai, Sr. Paulo de Sena iha nia intervensaun, haktuir katak nia parte kontente tebes ho prezensa JSMP tanba primeiravés Suku Labarai simu programa ne’e no mós tanba durante ne’e kazu oinoin deit maka akontese, nune’e husu ba estrutura suku hotu inklui lia-nain atu ativu iha programa ne’e tanba importante tebes ba ita nia suku.

Xefe suku hatutan katak JSMP hili ita nia suku atu ajuda ita nia kazu sira ne’ebé maka durante ne’e abandona ka la hatene nia prosesu sira, espera katak ho serbisu hamutuk ne’e bele lori progresu di’ak ba suku ne’e ho ita nia kooperasaun sira, nune’e husu ba estrutura hotu atu hatutan informasaun ba

komunidade sira nune'e iha kazu ruma bele komunika ho JSMP hodi bele ajuda ita.

Iha oportunidade ne'e xefe suku mós apresenta katak iha kazu abandona balu maka akontese iha sira nia suku, maibé sira lahatene oinsa mak atu prosesu tuir justisa formál.

Iha parte seluk representante Ministériu Interiór liuhosi Diresaun Nasionál Prevensaun Konflitu Komunitáriu (DNPCK) Sr. Sabino dos Reis haktuir katak programa ne'e di'ak tebes ba comunidade hodi tulun comunidade sira hodi halo mediasaun no fó solusaun ba disputa sira iha suku laran, serbisu JSMP ho DNPCK iha interligadu ba malu nune'e ba oin sei serbisu hamutuk hodi responde ba saida mak durante ne'e sai hanesan preokupasaun comunidade sira nian, bainhira akontese disputa ruma.

Programa ne'e ho nia objetivu mak atu tulun comunidade lokál sira no intervenente sira iha sistema justisa nasional hodi hadi'ak ligasaun entre sistema sira no mós hadi'ak justisa ida ne'ebé justu no ema hotu-hotu bele asesu iha nivel komunitáriu, ho atividade sira mak hanesan:

1. Observa prosesu rezolusaun disputa komunitáriu no hala'o peskiza lokál
2. Fornese informasaun hodi tulun halo revizaun ba iha Regra Tara-bandu
3. Fahe informasaun kona-ba progresu kazu sira hosi polisia tribunál, prokuradória ba iha suku sira tarjetu
4. Advokasia atu hadi'ak liután ligasaun comunidade sira ho justisa formál
5. Fahe informasaun kona-ba asesu ba sistema justisa formál
6. Sei introdus *Case Log* ba Konsellu suku sira no OPS kona-ba oinsa atu priense formuláriu kazu sira

MoU ne'e asina hosi Kordenadora Unidade Peskizadór Legál no Unidade Treinamentu no Advokasia JSMP, Sra. Flora Soriano Menezes no Xefe Suku Labarai, Sr. Paulo de Sena. Seremónia asinatura ne'e akompaña hosi Representante Administradór Postu Administrativu Suai Villa, Sr. Augusto Borges, representante Ministériu Interiór liuhosi Diresaun Nasionál Prevensaun Konflitu Komunitáriu (DNPCK), Sr. Sabino dos Reis no akompaña hosi Xefe Aldeia sira hosi Aldeia lima (5), lia-nain, delegadu/a, representante juventude feto no mane, mediadór posto sira hosi Ministériu Interiór.

Atividade ne'e, realiza hosi JSMP liuhosi Programa Apoiu Seguransa komunitária (PASK) tanba serbisu hamutuk ho The Asia Foundation (TAF) ne'ebé finansia hosi Embaixada Nova Zelândia iha Timor-Leste.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl

Telephone: (+670) 33238883 | 77040735

Website: <https://jsmp.tl>

info@jsmp.tl